

Iroun Mikaela Wilkins
(E boboto i aon te karaki ae koaua)

E riki te karaki aei i Amerika.

"Ngai Natin te Atua," E anene Cameron ma ataein te Moanrinan ma e tangiria n anene. Ao n te tai ae waekoa a nang bon anene n ana burokuraem te Moanrinan. Ai bon ti teuana te namwakaina ao e a roko!

Ngke e toki tain te anene, Titita Jones e karaoa te katanoata. "Ara tia biano n te Moanrinan e nang mwaing. Ti tangiria tabeman mai-roumi bwa kam na katang biano n ana burokuraem te Moanrinan. Iai iroumi ae kan katanga tekora ke uakora?"

CAMERON te Tia Katang Biano

*Cameron
e babanga
katangana,
ma e tangiria
n ibuobuoki.*


Cameron e katea baina. E tangiria n ibuobuoki n te burokuraem.

Titita Jones e korei araia ataei ake a tangiria ni kan ibuobuoki. "Emma. Ben. Ao Cameron! "I aki atai ae ko kona ni katangtang." E moangare.

Cameron e tuai n reirei mai imwaina, ma e tangiria ni karioi kuuna iaon te biano n ana auti tibuna te unaine.

"I tuai n rang ni bwaati raoi," e taku. "Ma I taku bwa I kona ngkana I kataneiai!"

"Ko rabwa ibukin am tatauraoni ni ibuobuoki," e taku Titita Jones. E anganiia ataei n tatabemania uakora kunaia bwa a na katangi.



Cameron e namakina ae kan biri rikaaki man te kawai n nakonako. E a kaman tangiria n reireinna, ao n te tai aei e nang bon karaoia!

"Ko taraa ni ingainga! Iai te bwai ae riki n te Moanrinan?" E titirakina tinana ngke a rinnako inanon te kaa imwiin te taromaui.

E wiingare Cameron. "N nang katang biano n ana burokuraem te Moanrinan!"

"I kukurei ngkai ko kan ibuobuoki," e taku Tinana. "Ma ko tuai raoi bwaati ni katang biano ngkana kona karaoa anne."

Cameron e kaeta nuukana n tekateka. "I kona n reireinai. N na kabanea au tai ni kataneiai! I kona ni kabongana ana biano Tibu te Unaine."

"Ti riai ni waaki, ngkanne!" E taku Tinana.

E buokaki iroun tinana Cameron ni kakaea ana tia reirei n te biano. Te tia reirei e kaota nakoina kawai aika a beebete ni katanga "I Love to See the Temple" ao "The Church of Jesus Christ."

Cameron e kataneiai n tainako n aron are e kona n ana auti tibuna te unaine. E katoai rain ni katangi ni kaokiokia. E mwaiti burena, ma e teimatoa ni kataia ao e reitinako ni katangitang. N tokina e a kona ni katang kuuna ni kauoua.

N te tai ae aki maan e a roko tain ana burokuraem te Moanrinan. "Tera am namakin?" E titiraki Tinana.

Cameron e mwanoka ana boki ni biano ni katena ma bwabwaana. "Nakonnano. Ma I kukurei naba."

Ngke e a roko n ana tai ni katangitang, e ruu bain Cameron teutana. *Tamara are i Karawa, taiaoka buokai*, e tataro n ana iango. E ikerake ni kamaana.

Imwiina e karaoa ana kabanea n tamaroa ni katangitang. Ataei ake tabeman a iria n anene.

N tokin te anene, e moangare. E rangi ni kaunga anne! E atai bwa te Tamnei ae Raoiroi e buokia.

Ngkai e a tia ni katanga tekora, Cameron e a namakina te mwengaraoi. E waakina te kauakora ni kuna. Tabonibaina a mwaing iaon taian kii n aron are e kataneiai iai.

Aio te kuna ae tangiria Cameron. E iangoi taekai ngke e katangitang. "I kakoaua te Tia Kamaiu,



Tera te rabakau ae ko tangiria n reiaikina?

Iesu Kristo. N na karinea Arana." E mwakuri korakora Cameron n reiaikina kuuna ake n te burokuraem.

Tao katangan te biano ngaia te kawai teuana n tibwaakin au koaua, e iango Cameron.

Imwiin te burokuraem, e inga Tinana ma Cameron.

"E uara?" e titiraki.

"I nakonnana n te moantai, ma e kaunga!" E taku Cameron. E tangiria ni kateimatoa ana kataneiai ao n reiaikina kuuna aika a mwaiti riki. ●